

03/02/1999

Malaysia tuan rumah sidang kekeluargaan

KUALA LUMPUR, Selasa - Malaysia akan menjadi tuan rumah persidangan antarabangsa mengenai kekeluargaan dan persediaan menghadapi alaf baru, April ini.

Persidangan lima hari bertemakan 'Cinta Murni dan Keluarga Sejati: Keadaan Penyatuan Sejagat' itu dijangka dihadiri 1,000 orang dari dalam dan luar negara.

Ia bertujuan berkongsi pengalaman antara negara dalam penyelesaian masalah kekeluargaan dan masalah sosial pada alaf akan datang.

Menteri Perpaduan Negara dan Pembangunan Masyarakat, Datin Paduka Zaleha Ismail, berkata Malaysia, yang dalam persediaan ke arah itu telah mengadakan persidangan peringkat kebangsaan di beberapa negeri sejak Mei 1997.

Sehubungan itu, katanya, penganjur sangat mengharapkan sumbangan sama ada berupa kewangan atau penajaan daripada sektor korporat dalam menjayakan persidangan antarabangsa itu.

Menurutnya, Perdana Menteri, Datuk Seri Dr Mahathir Mohamad telah menyatakan persetujuan untuk merasmikan persidangan yang dijadualkan pada 15 April itu.

Persidangan itu adalah sebahagian kempen Persidangan Cinta Murni dan Keluarga Sejati yang dianjurkan Kementerian Perpaduan Negara dan Pembangunan Masyarakat serta Persekutuan Wanita Bagi Keamanan Dunia (WFWP) Malaysia.

Zaleha berkata, persidangan itu dijangka mengemukakan cadangan mengenai penyakit sosial dan cara menanganinya untuk tindakan susulan Jawatankuasa Khas Kabinet Mengenai Masalah Sosial yang dipengerusikan oleh Menteri Pendidikan, Datuk Seri Najib Tun Razak.

Menurutnya, Timbalan Perdana Menteri, Datuk Seri Abdullah Ahmad Badawi juga dijangka membentangkan salah satu daripada enam kertas kerja.

Antara tajuk kertas kerja yang akan dibentangkan ialah Mengimbangi Kerjaya Dengan Tanggungjawab Kekeluargaan, Keluarga Dunia dalam Alaf Baru, Konsep Keluarga Sebenar Sebagai Satu Asas Untuk Keamanan Dunia serta Visi Baru Bagi Mencapai Keluarga Sebenar dalam Alaf Baru.

Bayaran pendaftaran ialah RM500 bagi setiap peserta dan mereka yang berminat boleh menghubungi Fasilitator Projek WFWP Malaysia, Shanthi Supramaniam di alamat 56B, Jalan SS2/61, 47300 Petaling Jaya atau menelefon 03-7771441/7738141 atau faks 03-7775173.

(END)